

DATE : 1 November 2014  
PUBLICATION : Utusan Online  
SECTION : Korporat  
HEADLINE : Maybank tawar dana Islam untuk China

---

## Maybank tawar dana Islam untuk China

01 November 2014 1:02 AM

 Share 0  Tweet 0  Google + 0



Ketua Pegawai Eksekutif Maybank Asset Management Group Bhd., Nor' Azamin Salleh - gambar google dari the Star

**DUBAI 31 Okt.** - Satu bentuk kerjasama antara firma pengurusan aset Malaysia dan Hong Kong diwujudkan, bertujuan memasarkan dana-dana Islam di China, sekali gus membantu meluaskan produk pelaburan yang mematuhi syariah di luar pusat teras industri itu di Asia Tenggara dan Asia Barat.

Cabang pengurusan aset Malayan Banking Bhd. dan firma berpangkalan di Hong Kong, Boser International akan bekerjasama membangunkan produk-produk pelaburan Islam, kata Ketua Pegawai Eksekutif Maybank Asset Management Group Bhd., Nor' Azamin Salleh kepada Reuters.

Menurutnya, dana pertama di bawah perjanjian itu akan melabur di dalam saham-saham Asia dan China, menggunakan mata wang Ringgit yang didaftarkan di Hong Kong menerusi perjanjian pengiktirafan bersama yang sememangnya telah wujud antara kedua-dua negara.

“Kami melakukan apa yang perlu untuk pelancaran dana ini dan akan diumumkan pada suku pertama 2015,” ujar beliau.

Bosera adalah anak syarikat milik penuh Bosera Asset Management, berpusat di Shenzhen dan merupakan firma pengurusan aset terbesar di China dengan aset bernilai AS\$30 (RM99) bilion yang diuruskannya. Bosera akan mempromosikan dana kepada pelanggan runcit, termasuk kepada 23 juta penduduk Islam di China.

“Kami menyusun dana kami untuk memenuhi tarikan antarabangsa di rantau ini menerusi kehadiran kami, maka itu kami terbuka kepada penyenaian bersilang dana yang kami rasakan bersesuaian,” kata Nor’ Azamin.

Aktiviti kewangan Islam di China sangat kecil, dan hanya pada September lalu, sebanyak AS\$1 (RM3.3) bilion bon Islam diterbitkan pertama kali di Hong Kong.

Penggubal undang-undang dari Hong Kong dan Malaysia mengadakan seminar bersama mengenai dana pelaburan Islam pada Jun lalu. Pada bulan yang sama, RHB Asset Management, cabang pelaburan RHB Capital melancarkan dana Islam pertamanya di Hong Kong. – Reuters